



ALTI HAIMELIGI VERSCHNUUFFER

750 JOOR ALTI HAIMELIGI VERSCHNUUFFER – AU MIR HÄNN GRÄCHNET

Ungläubig luegt dr Pierrot uff dr Boode, sy Goschtym isch nid vo dere Wält

Ganz in Gold erstrahlt är prächtig –
wohär het si Clique pletzlich soviel Gäld?
Syt Joohre wünsch är e pompöse Ufftritt,
und immer het me miesse spaare

Und jetzt auf aimol, dasch verdächtig, wird im grosse Stil uffgfahre.

Was isch das fir e gschpässig Gschicht, sinniert dr Pierrot vor sich aane

worum präsentiert sich d Clique jetzt in däm noble Raame?

Vor ihm stoot d Ladärne und dr Pierrot muess e weeneli lache

Was mache sini Gschpöhnli au fir sältsemi Sache

Uff dr Lampe stoot – do het ain wirggli e guete Humor

d AHV – si Clique – fyyrt schyns 750 Joor

Dr Pierrot rächnet und rächnet, ihm wird Angscht und Bang

750 Joor isch e langi Zyyt, gits denn d Fasnacht iberhaupt so lang?

Nai, das kah nid stimme, dasch lätz, das muess e Fähler si

Die Zahl muess korrigiert si, aber gly

Do het sich Aine bös verrächnet, isch mit de Nulle duurenander koo

Dä Gwaggli sott sich wirgglig schämme und in sich goo

Verrächne bi dr AHV – dr Pierrot legt si Stirn in Runzle

und muess denn numme no meh schmunzle

Är weiss jetzt wohär dä grossi Batze kunnt

Si Clique het sich au bim Gäld verrächnet, stellt är fescht und stuunt

Denn au d AHV in Bundesbärn

verrächnet sich bi Zahle gärn

E paar Milliarde meh, e paar Milliarde weniger –

das weiss kaine so genau

die Zahle schwangge hin und här, und kaine wird meh schlaue

Mit Trotz verkündet dr Diräggtter vom zuständige Bundesamt

und das findet dr Pierrot ibrigens allerhand

I dene Zahle sig denn kai Fähler versteggt

numme d Formle, wo me bruucht het, isch halt abverreggt

Das macht die ganzi Sach nid besser – s Vertraue isch ewägg

und d Frau Bundesrötene Baume-Schneider het dr Drägg

Si sig au irritiert, losst si verkünde – die Strategie isch wirgglig guet

anstatt Verantwortig z ybernäh, lächlet si und schiebt ab –

das bruucht Muet

Au s Departemänt vor Frau Käller-Sutter isch im Rächne schlächt uffgestellt

die ainzig Antwort wo vo deert kunnt haisst allewyl:

«wir haben kein Geld».

Die gröschti Laischtig vo dere Frau – und dasch kai Witz

Het sich bi dr Rettig vo dr CS zutrait – do stuunsch e bitz

Zmitts in dr Nacht het d Frau Bundesrötene, dasch dokumentiert,

delifoniert und sichergestellt, dass d Haizig im Sitzigszimmer funktioniert.

In eme kalte Raum, me wird das nie erfahre

wär die Truppe fir e gueti Lösig vielleicht besser gfahre

Doch au in Basel, mit dere riesige Verwaltung

verrächne die sich Joor fir Joor ganz gwalstig

Es wird e Budget gmacht, mit viil Tamtam

Und s haisst, dr Kanton isch wieder klamm

Zem Glügg, das rettet d Frau Soland bi de Wahle

Präsentiert si schlussändig denn gueti Zahle

Bi dr Frau Käller, die residiert am Minschterplatz

Sin d Berächnige bi jeedem Projäggt fir d Katz

Deert verrächne si sich um vili Millione

Und pfläge so die aigene Traditione

Bi jeedem Bauvorhabe, dasch laider woor

Bruuchts meh Gäld und es verzögert sich um vili Joor

Jo gits denn gar kai rundi Sache?

Muesch denn bim Rächne Fähler mache?

Dr Pierrot isch jetzt ganz bedruggt

Spiilt denn die ganzi Wält verruggt?

Doch halt – es git e guete Grund zem fyyre

Si Clique darf jo jubiliere

Syt 750 Joor, am Mäntigmoorge

Vergässe si ihri Alltagsorge

Dasch s Ainzig wo do zelle duet

Und das macht em Pierrot wieder Muet

Denn ains isch klar, und das isch wichtig

Wenn Fasnacht machsch, ligsch immer richtig

D Ladäärne-Ustellig uff em Minschterplatz und

d Waage-und Reggwisyte-Ustellig bi dr Kasärne sin vom Mäntig

znacht bis am Mittwuch demoorge!

Deert und an de 3 Verkaufsständ (CINS)

in dr Stadt ka men au alli Zeedel und Schnitzelbängg,

d'Blagedde und dr Rädäbäng kaufe.

Bisch e Kind, mechtsch Fasnacht mache,

denn gits kaini halbe Sachte!

So schrib denn unseri Obfrau aa

und mäld Di gschwind zem Yschooto aa.

Yyneluege:

Samschtig 22.03.2025

11.00 – 13.00 Uhr im Cliquekäller an dr

Malzgasse 9 in Basel

Mir fraie uns uf Di!

Fir Informatione mäldsch Di bi dr Obfrau:

Céline Ryffel,

Verschnuuffer Gnepf,

Malzgasse 9, 4052 Basel

E-Mail: gnepf@verschnuuffer.ch